

### 0.0.1 saḷāyatanavibhaṅgasuttaṃ

1. evaṃ me suttaṃ: ekaṃ samayaṃ bhagavā sāvatthiyaṃ viharati jetavane anāthapiṇḍikassa ārāme. tatra kho bhagavā bhikkhu āmantesi bhikkhavoti. bhaddanteti te bhikkhū bhagavato paccassosum. bhagavā etadavoca:

2. saḷayatanavibhaṅgaṃ vo bhikkhave, desissāmi taṃ suṇātha sādhukaṃ manasi karoṭha bhāssissāmīti.

3. evaṃ bhanteti kho te bhikkhū bhagavato paccassosum. bhagavā etadavoca:

4. cha ajjhattikāni āyatanāni veditabbāni. cha bāhirāni āyatanāni veditabbāni. cha viññāṇakāyā veditabbā. cha phassakāyā veditabbā. aṭṭhārasa manopavicārā veditabbā. chaṭṭiṃsa sattapadā veditabbā. tatrīdaṃ nissāya idaṃ pajahatha tayo satipaṭṭhānā yadiriyo sevati, yadiriyo sevamāno satthā gaṇamanusāsītumarahati, so vuccati yoggācariyānaṃ anuttaro purisadammasārathī'ti. ayamuddeso saḷāyatanavibhaṅgassa.

5. cha ajjhattikāni āyatanāni veditabbānīti iti kho panetaṃ vuttaṃ, kiñcetaṃ paṭicca vuttaṃ: cakkhāyatanaṃ sotāyatanaṃ ghāṇāyatanaṃ jivhāyatanaṃ kāyāyatanaṃ manāyatanaṃ. cha ajjhattikāni āyatanāni

veditabbānīti iti yaṃ taṃ vuttaṃ, idameṭaṃ paṭicca vuttaṃ. cha bāhirāni āyatanāni veditabbānīti iti kho panetaṃ vuttaṃ, kiñcetaṃ paṭicca vuttaṃ: rūpāyatanaṃ saddāyatanaṃ gandhāyatanaṃ rasāyatanaṃ phoṭṭhabbāyatanaṃ dhammāyatanaṃ. cha bāhirāni āyatanāni veditabbānīti iti yaṃ taṃ vuttaṃ, idameṭaṃ paṭicca vuttaṃ.

6. cha viññāṇakāyā veditabbānīti iti kho panetaṃ vuttaṃ, kiñcetaṃ paṭicca vuttaṃ: cakkhuvīññāṇaṃ sotaviññāṇaṃ ghānaviññāṇaṃ jivhāviññāṇaṃ kāyaviññāṇaṃ manoviññāṇaṃ. cha viññāṇakāyā veditabbānīti iti yaṃ taṃ vuttaṃ, idameṭaṃ paṭicca vuttaṃ.

7. cha phassakāyā veditabbānīti iti kho panetaṃ vuttaṃ, kiñcetaṃ paṭicca vuttaṃ: cakkhusamphasso sotasamphasso ghānasamphasso jivhāsamphasso kāyasamphasso manosamphasso. cha phassakāyā veditabbānīti iti yaṃ taṃ vuttaṃ, idameṭaṃ paṭicca vuttaṃ.

8. aṭṭhārasa manopavicārā veditabbāti iti kho panetaṃ vuttaṃ, kiñcetaṃ paṭicca vuttaṃ: cakkhunā rūpaṃ disvā somanassaṭṭhānīyaṃ rūpaṃ upavicarati. domanassaṭṭhānīyaṃ rūpaṃ upavicarati. upekkhaṭṭhānīyaṃ rūpaṃ upavicarati. sotena saddaṃ sutvā somanassaṭṭhānīyaṃ saddaṃ upavicarati. domanassaṭṭhānīyaṃ saddaṃ upavicarati. upekkhaṭṭhānīyaṃ saddaṃ upavicarati. ghānena gandhaṃ ghāyitvā soma-

nassatṭhāṇiyaṃ gandhaṃ upavicarati. domanassatṭhāṇiyaṃ gandhaṃ upavicarati. upekkhatṭhāṇiyaṃ ghandhaṃ upavicarati. jivhāya rasaṃ sāyitvā somanassatṭhāṇiyaṃ rasaṃ upavicarati. domanassatṭhāṇiyaṃ rasaṃ upavicarati. upekkhatṭhāṇiyaṃ rasaṃ upavicarati. kāyena phoṭṭhabbaṃ phusitvā somanassatṭhāṇiyaṃ phoṭṭhabbaṃ upavicarati. domanassatṭhāṇiyaṃ phoṭṭhabbaṃ upavicarati. upekkhatṭhāṇiyaṃ phoṭṭhabbaṃ upavicarati. manasā dhammaṃ viññāya somanassatṭhāṇiyaṃ dhammaṃ upavicarati. domanassatṭhāṇiyaṃ dhammaṃ upavicarati. upekkhatṭhāṇiyaṃ<sup>1</sup> dhammaṃ upavicarati. iti cha somanassūpavicārā, cha domanassūpavicārā, cha upekkhūpavicārā. atṭhārasa manopavicārā veditabbāti iti yaṃ taṃ vuttaṃ, idametam paṭicca vuttaṃ.

9. chattimsa sattapadā veditabbāti iti kho panetaṃ vuttaṃ, kiñce taṃ paṭicca vuttaṃ: cha gehasitāni somanassāni, cha nekkhammasitāni somanassāni, cha gehasitāni domanassāni, cha nekkhammasitāni domanassāni, cha gehasitā upekkhā, cha nekkhammasitā upekkhā.

10. tattha katamāni cha gehasitāni somanassāni: cakkhuviññeyyānaṃ rūpānaṃ iṭṭhānaṃ kantānaṃ manāpānaṃ manoramānaṃ lokāmisapaṭisaṃyuttānaṃ paṭilābhaṃ vā paṭilābhato samanupassato pubbe vā paṭiladdhapubbaṃ atītaṃ niruddhaṃ vipariṇataṃ sama-

<sup>1</sup>upekkhāṭṭhāṇiyaṃ-majasam.

nussarato uppajjati somanassam, yaṃ evarūpaṃ somanassam idaṃ vuccati gehasitaṃ somanassam. sotaviññeyyānaṃ saddānaṃ iṭṭhānaṃ kantānaṃ manāpānaṃ manoramānaṃ lokāmisapaṭisaṃyuttānaṃ paṭilābham vā paṭilābhato samanupassato pubbe vā paṭiladdhapubbaṃ atītaṃ niruddhaṃ vipariṇataṃ samanussarato uppajjati somanassam, yaṃ rūpānaṃ somanassam idaṃ vuccati gehasitaṃ somanassam. ghānaviññeyyānaṃ gandhānaṃ iṭṭhānaṃ kantānaṃ manāpānaṃ manoramānaṃ lokāmisapaṭisaṃyuttānaṃ paṭilābham vā paṭilābhato samanupassato pubbe vā paṭiladdhapubbaṃ atītaṃ niruddhaṃ vipariṇataṃ samanussarato uppajjati somanassam, yaṃ evarūpaṃ somanassam idaṃ vuccati gehasitaṃ somanassam. jivhāviññeyyānaṃ rasānaṃ iṭṭhānaṃ kantānaṃ manāpānaṃ manoramānaṃ lokāmisapaṭisaṃyuttānaṃ paṭilābham vā paṭilābhato samanupassato pubbe vā paṭiladdhapubbaṃ atītaṃ niruddhaṃ vipariṇataṃ samanussarato uppajjati somanassam, yaṃ evarūpaṃ somanassam idaṃ vuccati gehasitaṃ somanassam. kāyaviññeyyānaṃ phoṭṭhabbānaṃ iṭṭhānaṃ kantānaṃ manāpānaṃ manoramānaṃ lokāmisapaṭisaṃyuttānaṃ paṭilābham vā paṭilābhato samanupassato pubbe vā paṭiladdhapubbaṃ atītaṃ niruddhaṃ vipariṇataṃ samanussarato uppajjati somanassam, yaṃ evarūpaṃ somanassam idaṃ vuccati gehasitaṃ somanassam. manoviññeyyānaṃ dhammānaṃ iṭṭhānaṃ kantānaṃ manāpānaṃ manoramānaṃ lokāmisapaṭisaṃyuttānaṃ paṭilābham vā paṭilābhato samanupassato pubbe vā paṭiladdhapubbaṃ atītaṃ niruddhaṃ vipariṇataṃ sama-

nussarato uppajjati somanassam, yaṃ evarūpaṃ somanassam idaṃ vuccati gehasitaṃ somanassam. imāni cha gehasitāni somanassāni.

11. tattha katamāni cha nekkhammasitāni somanasāni: rūpānaṃ tveva aniccatam veditvā vipariṇāma-virāganirodham, pubbe ceva rūpā etarahi ca sabbe te rūpā aniccā dukkhā vipariṇāmadhammā'ti evame-taṃ yathābhūtaṃ sammappaññāya passato uppajjati somanassam. yaṃ evarūpaṃ somanassam, idaṃ vuccati nekkhammasitaṃ somanassam. saddānaṃ tveva aniccatam veditvā vipariṇāmavirāganirodham, pubbe ceva saddā etarahi ca sabbe te saddā aniccā dukkhā vipariṇāmadhammā'ti evametaṃ yathābhūtaṃ sammappaññāya passato uppajjati somanassam. yaṃ evarūpaṃ somanassam, idaṃ vuccati nekkhammasitaṃ somanassam. gandhānaṃ tveva aniccatam veditvā vipariṇāmavirāganirodham, pubbe ceva gandhā etarahi ca sabbe te saddā aniccā dukkhā vipariṇāmadhammā'ti evametaṃ yathābhūtaṃ sammappaññāya passato uppajjati somanassam. yaṃ evarūpaṃ somanassam, idaṃ vuccati nekkhammasitaṃ somanassam. rasānaṃ tveva aniccatam veditvā vipariṇāmavirāganirodham, pubbe ceva rasā etarahi ca sabbe te rasā aniccā dukkhā vipariṇāmadhammā'ti evametaṃ yathābhūtaṃ sammappaññāya passato uppajjati somanassam. yaṃ evarūpaṃ somanassam, idaṃ vuccati nekkhammasitaṃ somanassam. phoṭṭhabbānaṃ tveva aniccatam veditvā vipariṇāmavirāganirodham, pubbe ceva phoṭṭhabbā eta-

rahi ca sabbe te phoṭṭhabbā aniccā dukkhā vipariṇāmadhammā'ti evametam yathābhūtam sammappaññāya passato uppajjati somanassam. yaṃ evarūpaṃ somanassam, idaṃ vuccati nekkhammasitam somanassam. dhammānaṃ tveva aniccataṃ veditvā vipariṇāma virāganīrodham, pubbe ceva dhammā, etarahi ca sabbe te dhammā aniccā dukkhā vipariṇāmadhammā'ti evametam yathābhūtam sammappaññāya passato uppajjati somanassam. yaṃ evarūpā somanassam, idaṃ vuccati nekkhammasitam somanassam. imāni cha nekkhammasitāni somanassāni.

12. tattha katamāni cha gehasitāni domanassāni: cakkhaviññeyyānaṃ rūpānaṃ itṭhānaṃ kantānaṃ manāpānaṃ manoramānaṃ lokāmisapaṭisaṃyuttānaṃ appaṭilābham vā appaṭilābhato samanupassato pubbe vā appaṭiladdhapubbam atītaṃ niruddham vipariṇataṃ samanussarato uppajjati domanassam. yaṃ evarūpaṃ domanassam, idaṃ vuccati gehasitam domanassam. sotaviññeyyānaṃ saddānaṃ itṭhānaṃ kantānaṃ manāpānaṃ manoramānaṃ lokāmisapaṭisaṃyuttānaṃ appaṭilābham vā appaṭilābhato samanupassato pubbe vā appaṭiladdhapubbam atītaṃ niruddham vipariṇataṃ samanussarato uppajjati domanassam. yaṃ evarūpaṃ domanassam, idaṃ vuccati gehasitam domanassam. ghānaviññeyyānaṃ gandhānaṃ itṭhānaṃ kantānaṃ manāpānaṃ manoramānaṃ lokāmisapaṭisaṃyuttānaṃ appaṭilābham vā appaṭilābhato samanupassato pubbe vā appaṭiladdhapubbam atītaṃ niruddham vipariṇataṃ

samanussarato uppajjati domanassam. yaṃ evarūpaṃ domanassam. idaṃ vuccati gehasitaṃ domanassam. jivhāviññeyyānaṃ rasānaṃ itṭhānaṃ kantānaṃ manāpānaṃ manoramānaṃ lokāmisapaṭisaṃyuttānaṃ appaṭilābhaṃ vā appaṭilābhato samanupassato pubbe vā appaṭiladdhapubbaṃ atītaṃ niruddhaṃ vipariṇataṃ samanussarato uppajjati domanassam. yaṃ evarūpaṃ domanassam. idaṃ vuccati gehasitaṃ domanassam. kāyaviññeyyānaṃ phoṭṭhabbānaṃ itṭhānaṃ kantānaṃ manāpānaṃ manoramānaṃ lokāmisapaṭisaṃyuttānaṃ appaṭilābhaṃ vā appaṭilābhato samanupassato pubbe vā appaṭiladdhapubbaṃ atītaṃ niruddhaṃ vipariṇataṃ samanussarato uppajjati domanassam. yaṃ evarūpaṃ domanassam. idaṃ vuccati gehasitaṃ domanassam. manoviññeyyānaṃ dhammānaṃ itṭhānaṃ kantānaṃ manāpānaṃ manoramānaṃ lokāmisapaṭisaṃyuttānaṃ appaṭilābhaṃ vā appaṭilābhato samanupassato pubbe vā appaṭiladdhapubbaṃ atītaṃ niruddhaṃ vipariṇataṃ samanussarato uppajjati domanassam. yaṃ evarūpaṃ domanassam. idaṃ vuccati gehasitaṃ domanassam. imāni cha gehasitāni domanassāni.

13. tattha katamāni cha nekkhammasitāni domanassāni: rūpānaṃ tveva aniccatam viditvā vipariṇāma-virāganirodhaṃ, pubbe ceva rūpā etarahi ca sabbe te rūpā aniccā dukkhā vipariṇāmadhammāti. evame-taṃ yathābhūtaṃ sammappaññāya disvā anuttaresu vimokkhesu pihaṃ upaṭṭhāpeti: kudassu<sup>2</sup> nāmāhaṃ tadāyatanam upasampajja viharissāmi. yadariyā eta-

<sup>2</sup>kudussu-majasaṃ.

rahi āyatanam upasampajja viharantī'ti. iti anuttaresu  
 vimokkhesu piham upaṭṭhāpayato upapajjati pihappac-  
 cayā domanassam. yaṃ evarūpaṃ domanassam, idaṃ  
 vuccati nekkhammasitam domanassam. saddānam tveva  
 aniccatam veditvā vipariṇāmavirāganirodham, pubbe  
 ceva saddā etarahi ca sabbe te saddā aniccā dukkhā  
 vipariṇāmadhammāti. evametaṃ yathābhūtaṃ sam-  
 mappaññāya disvā anuttaresu vimokkhesu piham upaṭ-  
 ṭhāpeti: kudassu nāmāham tadāyatanam upasampajja  
 viharissāmi. yadariyā etarahi āyatanam upasampajja  
 viharantī'ti. iti anuttaresu vimokkhesu piham upaṭ-  
 ṭhāpayato upapajjati pihappaccayā domanassam. yaṃ  
 evarūpaṃ domanassam, idaṃ vuccati nekkhammasi-  
 tam domanassam. gandhānam tveva aniccatam vidi-  
 tvā vipariṇāmavirāganirodham, pubbe ceva rūpā eta-  
 rahi ca sabbe te rūpā aniccā dukkhā vipariṇāmadham-  
 māti. evametaṃ yathābhūtaṃ sammappaññāya disvā  
 anuttaresu vimokkhesu piham upaṭṭhāpeti: kudassu  
 nāmāham tadāyatanam upasampajja viharissāmi. ya-  
 dariyā etarahi āyatanam upasampajja viharantī'ti. iti  
 anuttaresu vimokkhesu piham upaṭṭhāpayato upapaj-  
 jati pihappaccayā domanassam. yaṃ evarūpaṃ doma-  
 nassam, idaṃ vuccati nekkhammasitam domanassam.  
 rasānam tveva aniccatam veditvā vipariṇāmavirāga-  
 nirodham, pubbe ceva rasā etarahi ca sabbe te rasā  
 aniccā dukkhā vipariṇāmadhammāti. evametaṃ ya-  
 thābhūtaṃ sammappaññāya disvā anuttaresu vimok-  
 khesu piham upaṭṭhāpeti: kudassu nāmāham tadāya-  
 tanam upasampajja viharissāmi. yadariyā etarahi āya-  
 tanam upasampajja viharantī'ti. iti anuttaresu vimok-



khesu pihaṃ upaṭṭhāpayato upapajjati pihappaccayā domanassaṃ. yaṃ evarūpaṃ domanassaṃ, idaṃ vuccati nekkhammasitaṃ domanassaṃ. phoṭṭhabbānaṃ tveva aniccataṃ viditvā vipariṇāmavirāgaṇirodhaṃ, pubbe ceva phoṭṭhabbā etarahi ca sabbe te phoṭṭhabbā aniccā dukkhā vipariṇāmadhammāti. evametaṃ yathābhūtaṃ sammappaññāya disvā anuttaresu vimokkhesu pihaṃ upaṭṭhāpeti: kudassu nāmāhaṃ tadāyatanaṃ upasampajja viharissāmi. yadariyā etarahi āyatanaṃ upasampajja viharantī'ti. iti anuttaresu vimokkhesu pihaṃ upaṭṭhāpayato upapajjati pihappaccayā domanassaṃ. yaṃ evarūpaṃ domanassaṃ, idaṃ vuccati nekkhammasitaṃ domanassaṃ. dhammānaṃ tveva aniccataṃ viditvā vipariṇāmavirāgaṇirodhaṃ, pubbe ceva dhammā etarahi ca sabbe te dhammā aniccā dukkhā vipariṇāmadhammāti. evametaṃ yathābhūtaṃ sammappaññāya disvā anuttaresu vimokkhesu pihaṃ upaṭṭhāpeti: kudassu nāmāhaṃ tadāyatanaṃ upasampajja viharissāmi. yadariyā etarahi āyatanaṃ upasampajja viharantī'ti. iti anuttaresu vimokkhesu pihaṃ upaṭṭhāpayato upapajjati pihappaccayā domanassaṃ. yaṃ evarūpaṃ domanassaṃ, idaṃ vuccati nekkhammasitaṃ domanassaṃ. imāni cha nekkhammasitāni domanassāni.

14. tattha katamā cha gehasitā upekkhā: cakkhunā rūpaṃ disvā upapajjati upekkhā bālassa mūlhasa puthujjanassa anodhijinassa avipākajinassa anādīnavadassāvino assutavato puthujjanassa. yā evarūpā upek-

khā, rūpaṃ sā nātivattati. tasmā sā upekkhā gehasitāni vuccati. sotena saddaṃ sutvā upapajjati upekkhā bālassa mūlhasa puthujjanassa anodhijinassa avipākajinassa anādīnavadassāvino assutavato puthujjanassa. yā evarūpā upekkhā, saddā sā nātivattati. tasmā sā upekkhā gehasitāni vuccati. ghānena gandhaṃ ghāyitvā upapajjati upekkhā bālassa mūlhasa puthujjanassa anodhijinassa avipākajinassa anādīnavadassāvino assutavato puthujjanassa. yā evarūpaṃ upekkhā, gandhā sā nātivattati. tasmā sā upekkhā gehasitāni vuccati. jivhāya rasaṃ sāyitvā upapajjati upekkhā bālassa mūlhasa puthujjanassa anodhijinassa avipākajinassa anādīnavadassāvino assutavato puthujjanassa. yā evarūpaṃ upekkhā, rasā sā nātivattati. tasmā sā upekkhā gehasitāni vuccati. kāyena phoṭṭhabbaṃ phusitvā upapajjati upekkhā bālassa mūlhasa puthujjanassa anodhijinassa avipākajinassa anādīnavadassāvino asutavato puthujjanassa. yā evarūpaṃ upekkhā, phoṭṭhabbaṃ sā nātivattati. tasmā sā upekkhā gehasitāni vuccati. manasā dhammaṃ viññāya upapajjati upekkhā bālassa mūlhasa puthujjanassa anodhijinassa avipākajinassa anādīnavadassāvino assutavato puthujjanassa. yā evarūpā upekkhā, dhammaṃ sā nātivattati. tasmā sā upekkhā gehasitāni vuccati. imā cha gehasitā upekkhā.

**15.** tattha katamā cha nekkhammasitā upekkhā: rūpānaṃ tveva aniccatāṃ veditvā vipariṇāma virāgaṇirodhaṃ, pubbe ceva rūpā etarahi ca sabbe te rūpā aniccā

dukkhā vipariṇāmadhammā'ti evametam yathābhūtam sammappaññāya passato upapajjati upekkhā yā evarūpā upekkhā rūpaṃ sā ativattati. tasmā sā upekkhā nekkhammasitāti vuccati. saddhānaṃ tveva aniccataṃ viditvā vipariṇāmavirāganirodhaṃ, pubbe ceva saddā etarahi ca sabbe te saddā aniccā dukkhā vipariṇāmadhammā'ti evametam yathābhūtam sammappaññāya passato upapajjati upekkhā yā evarūpā upekkhā saddaṃ sā ativattati. tasmā sā upekkhā nekkhammasitāti vuccati. gandhānaṃ tveva aniccataṃ viditvā vipariṇāmavirāganirodhaṃ, pubbe ceva gandhā etarahi ca sabbe te gandhā aniccā dukkhā vipariṇāmadhammā'ti evametam yathābhūtam sammappaññāya passato upapajjati upekkhā yā evarūpā upekkhā gandhaṃ sā ativattati. tasmā sā upekkhā nekkhammasitāti vuccati. rasānaṃ tveva aniccataṃ viditvā vipariṇāmavirāganirodhaṃ, pubbe ceva rasā etarahi ca sabbe te rasā aniccā dukkhā vipariṇāmadhammā'ti evametam yathābhūtam sammappaññāya passato upapajjati upekkhā yā evarūpā upekkhā rasaṃ sā ativattati. tasmā sā upekkhā nekkhammasitāti vuccati. phoṭṭhabbānaṃ tveva aniccataṃ viditvā vipariṇāmavirāganirodhaṃ, pubbe ceva phoṭṭhabbā etarahi ca sabbe te phoṭṭhabbā aniccā dukkhā vipariṇāmadhammā'ti evametam yathābhūtam sammappaññāya passato upapajjati upekkhā yā evarūpā upekkhā phoṭṭhabbaṃ sā ativattati. tasmā sā upekkhā nekkhammasitāti vuccati. dhammā tveva aniccataṃ viditvā vipariṇāmavirāganirodhaṃ, pubbe ceva dhammā etarahi ca sabbe te dhammā aniccā dukkhā vipariṇāmadhammā'ti evametam yathābhūtam sammap-

paññāya passato upapajjati upekkhā yā evarūpā upekkhā dhammaṃ sā ativattati. tasmā sā upekkhā nekkhammasitāti vuccati. imā cha nekkhammasitā upekkhā. chattim̐sa sattapadā veditabbāti iti yaṃ taṃ vuttaṃ, idametaṃ paṭicca vuttaṃ.

**16.** tatridaṃ nissāya idaṃ pajahathāti iti kho pane-taṃ vuttaṃ, kiñcetaṃ paṭicca vuttaṃ: tatra bhikkhave, yāni cha nekkhammasitāni somanassāni, tāni nissāya tāni āgama, yāni cha gehasitāni somanassāni tāni pajahatha, tāni samatikkamatha. evametesam̐ pahānaṃ hoti, evametesam̐ samatikkamo hoti. tatra bhikkhave yāni cha nekkhammasitāni domanassāni tāni nissāya tāni āgama yāni cha gehasitāni domanassāni, tāni pajahatha. tāni samatikkamatha. evametesam̐ pahānaṃ hoti. evametesam̐ samatikkamo hoti. tatra bhikkhave yā cha nekkhammasitā upekkhā, tā nissāya tā āgama, yā cha gehasitā upekkhā tā pajahatha, tā samatikkamatha evametāsam̐ pahānaṃ hoti, evametāsam̐ samatikkamo hoti. tatra bhikkhave, yāni cha nekkhammasitāni somanassāni, tāni nissāya tāni āgama, yāni cha nekkhammasitāni domanassāni. tāni pajahatha, tāni samatikkamatha. evametesam̐ pahānaṃ hoti, evametesam̐ samatikkamo hoti. tatra bhikkhave, yā cha nekkhammasitā upekkhā, tā nissāya tā āgama yāni cha nekkhammasitāni somanassāni tāni pajahatha, tāni samatikkamatha. evametesam̐ pahānaṃ hoti, evametesam̐ samatikkamo hoti.

17. atthi bhikkhave, upekkhā nānattā nānattasitā. atthi upekkhā ekattā ekattasitā. katamā ca bhikkhave, upekkhā nānattā nānattasitā: atthi bhikkhave, upekkhā rūpesu, atthi saddesu, atthi gandhesu, atthi rasesu, atthi phoṭṭhabbesu. ayaṃ bhikkhave upekkhā nānattā nānattasitā.

18. katamā ca bhikkhave, upekkhā ekattā ekattasitā: atthi bhikkhave, upekkhā ākāśānañcāyatananissitā, atthi viññāṇañcāyatananissitā, ākiñcaññāyatananissitā, atthi nevasaññānāsaññāyatananissitā. ayaṃ bhikkhave, upekkhā ekattā ekattasitā. tatra bhikkhave, yā'yaṃ upekkhā ekattā ekattasitā, taṃ nissāya taṃ āgama, yā'yaṃ upekkhā nānattā nānattasitā, taṃ pajahatha, taṃ samatikkamatha. evametissā pahānaṃ hoti, evametissā samatikkamo hoti. atammayaṃ taṃ bhikkhave, nissāya atammayaṃ āgama yā'yaṃ upekkhā ekattā ekattasitā taṃ pajahatha. taṃ samatikkamatha. evametissā samatikkamo hoti. tatridaṃ nissāya idaṃ pajahatha'ti iti yaṃ taṃ vuttaṃ, idameṭaṃ paṭicca vuttaṃ.

19. 'tayo satipaṭṭhānā yadariyo sevati, yadariyo sevamāno satthā gaṇamanusāsiturarahati'ti iti kho paṇetaṃ vuttaṃ. kiñcetaṃ paṭicca vuttaṃ: idha bhikkhave, satthā sāvakaṇaṃ dhammaṃ deseti anukampako hitesī anukampaṃ upādāya: 'idaṃ vo hitāya idaṃ vo sukhāyā'ti. tassa sāvakaṃ na sussūsanti. na sotaṃ

odahanti. na aññā cittaṃ upaṭṭhapenti. vakkamma ca satthusāsanam vattanti. tatra bhikkhave, tathāgato na ceva attamano hoti. na ca attamanataṃ paṭisaṃvedeti. anavassuto ca viharati sato sampajāno. idaṃ bhikkhave, paṭhamam satipaṭṭhānam, yadariyo sevati, yadariyo sevamāno satthā gaṇamanusāsitarahati.

**20.** puna ca param bhikkhave, satthā sāvakānam dhammam deseti anukampako hitesī anukampam upādāya: 'idaṃ vo hitāya, idaṃ vo sukhāyā'ti. tassa ekacce sāvakā na sussūsanti, na sotaṃ odahanti, na aññā cittaṃ upaṭṭhapenti. vakkamma ca satthusāsanam vattanti. ekacce sāvakā sussūsanti. sotaṃ odahanti aññā cittaṃ upaṭṭhapenti. na ca vakkamma satthusāsanam vattanti. tatra bhikkhave, tathāgato na ceva attamano hoti, na ca attamanataṃ paṭisaṃvedeti. na ca anattamano hoti. na ca anattamanataṃ paṭisaṃvedeti. attamanatañca anattamanatañca<sup>3</sup> tadūbhayaṃ abhinivaj-jetvā so upekkhako viharati sato sampajāno. idaṃ vuccati bhikkhave, dutiyam satipaṭṭhānam yadariyo sevati, yadariyo sevamāno satthā gaṇamanusāsitarahati.

**21.** puna ca param bhikkhave, satthā sāvakānam dhammam deseti anukampako hitesī anukampam upādāya: 'idaṃ vo hitāya, idaṃ vo sukhāyā'ti tassa sāvakā sussūsanti, sotaṃ odahanti, aññā cittaṃ upaṭṭhapenti, na ca vakkamma satthusāsanam vattanti. tatra bhikkhave,

<sup>3</sup>attamanatā ca anattamanatā ca-majasam.

tathāgato attamano ceva hoti, attamanatañca paṭisaṃvedeti. anavassuto ca viharati sato sampajāno. idaṃ vuccati bhikkhave, tatiyaṃ satipaṭṭhānaṃ yadariyo sevati yadariyo sevamāno satthā gaṇamanusāsītumarahati.

**22.** tayo satipaṭṭhānā yadariyo sevati, yadariyo sevamāno satthā gaṇamanusāsītumarahatīti iti yaṃ taṃ vuttaṃ idametam, paṭicca vuttaṃ.

**23.** so vuccati yoggācariyānaṃ anuttaro purisadammasārathīti iti kho panetaṃ vuttaṃ, kiñcetaṃ paṭicca vuttaṃ: hatthidamakena bhikkhave, hatthidammo sārīto ekaṃyeva disaṃ dhāvati, puratthimaṃ vā pacchimaṃ vā uttaraṃ vā dakkhiṇaṃ vā. assadamakena bhikkhave, assadammo sārīto ekaṃyeva disaṃ dhāvati, puratthimaṃ vā pacchimaṃ vā uttaraṃ vā dakkhiṇaṃ vā. godamakena bhikkhave, godammo sārīto ekaṃyeva disaṃ dhāvati puratthimaṃ vā pacchimaṃ vā uttaraṃ vā dakkhiṇaṃ vā. tathāgatena hi bhikkhave, arahatā sammāsambuddhena purisadammo sārīto aṭṭhadisā vidhāvati rūpī rūpāni passati. ayaṃ paṭṭhamā disā<sup>4</sup> ajjhataṃ arūpasaññī bahiddhā rūpāni passati. ayaṃ dutiyā disā. subhantveva adhimutto hoti. ayaṃ tatiyā disā. sabbaso rūpasaññānaṃ samatikkamā paṭighasaññānaṃ atthaṅgamā nānattasaññānaṃ amanasikārā 'ananto ākāso'ti ākāsaññācāyatanaṃ upasampajja viharati. ayaṃ catutthī disā. sabbaso ākāsaññā-

cāyatanam samatikkamma anantaṃ viññāṇanti viññā-  
 ṇañcāyatanam upasampajja viharati ayaṃ pañcamī disā.  
 sabbaso viññāṇañcāyatanam samatikkamma natthi kiñ-  
 cīti ākiñcaññāyatanam upasampajja viharati. ayaṃ  
 chaṭṭhi disā. sabbaso ākiñcaññāyatanam samatikkamma  
 nevasaññānāsaññāyatanam upasampajja viharati. ayaṃ  
 sattamī disā. sabbaso nevasaññā nāsaññāyatanam sa-  
 matikkamma saññāvedayitanirodham upasampajja vi-  
 harati. ayaṃ aṭṭhamī disā. tathāgatena bhikkhave,  
 arahatā sammāsambuddhena purisadammo sārīto. imā  
 aṭṭha disā vidhāvati. so vuccati yoggācariyānaṃ anut-  
 taro purisadammasārathīti iti yaṃ taṃ vuttaṃ, idame-  
 taṃ paṭicca vuttanti.

**24.** idamavoca bhagavā attamanā te bhikkhū bhaga-  
 vato bhāsitaṃ abhinanduntī.